

दिनांक 13.07.2024
समय: 18.45 बजे

आकाशवाणी जयपुर-अजमेर

प्रादेशिक समाचार

- भाजपा री प्रदेश कार्यसमिति री मीटिंग जयपुर मांय राख्यी ज्यी-केन्द्रीय मंत्री शिवराज सिंह चौहान कह्यो-विचार भाजपा री आत्मा अर कार्यकर्ता इण रा प्राण है।
- प्रदेश मांय आज राष्ट्रीय लोक अदालत लगायी ज्यी-राजीनामा ऊं मामला निपटायी ज्या।
- राज्य मांय चौमासा री बिरखा-आवता तीन दिन मांय न्यारा-न्यारा संभाग मांय बिरखा रा आसार।

अर

- भारत अर जिम्बाब्वे बीचे चौथा टी-ट्वेंटी क्रिकेट मैच मांय भारत ने जीतण सारु 153 रन बणावण री दरकार।

000

भारतीय जनता पार्टी री प्रदेश कार्यसमिति री मीटिंग आज जयपुर मांय राख्यी ज्यी। मीटिंग मांय प्रदेश रा मुख्यमंत्री, केन्द्रीय मंत्री, राज्य सरकार मांय मंत्री अर पार्टी रा ओहदादारां सागे भाजपा रा करीब आठ हजार ओहदादार, जनता रा नुमाइंदा अर कार्यकर्ता शामिल व्ह्या। मीटिंग मांय मुख्यमंत्री भजनलाल शर्मा कह्यो के भाजपा रा हर कार्यकर्ता माथे केंद्र री निजर है। मुख्यमंत्री कह्यो के वे ई न्हाना कार्यकर्ता है अर पार्टी रा कार्यकर्तावां बीचे ऊं ई निकळ र मुख्यमंत्री बण्या है। शर्मा कह्यो के भाजपा मांय ई कार्यकर्तावां ने मोटा ओहदा माथे बैठक रो मौको दियो जावे है।

कार्यक्रम मांय केंद्रीय कृषि मंत्री अर मध्यप्रदेश रा पैली वाळा मुख्यमंत्री शिवराज सिंह चौहान कह्यो के विचार भाजपा री आत्मा है जद के कार्यकर्ता इण रा प्राण है। वे कह्यो के भाजपा सारु सियासत पेशो नी है बल्कि मिशन है।

मीटिंग मांय पार्टी रा महासचिव दुष्यंत गौतम, केंद्रीय मंत्री भूपेंद्र यादव, अर्जुनराम मेघवाल, भागीरथ चौधरी, मुख्यमंत्री भजनलाल शर्मा, उप मुख्यमंत्री प्रेमचंद बैरवा, कैबिनेट मंत्री राज्यवर्धन सिंह राठौड़, भाजपा रा आला नेता ओम माथुर अर राजेंद्र राठौड़ समेत केई नेता मौजूद रह्या।

000

स्वास्थ्य मंत्री जगत प्रकाश नड्डा कह्यो है के आयुष्मान भारत प्रधानमंत्री जन आरोग्य योजना अर आयुष्मान भारत डिजिटल मिशन योजना वां रा तय मकसद कामयाबी सागे हासिल कर रही है। वे नई दिल्ली मांय राष्ट्रीय स्वास्थ्य प्राधिकरण रा आला अहलकारां सागे मीटिंग कर र आं योजनावां रा तैत कामकाज रो जायजो लीनो। नड्डा सोशल मीडिया पोस्ट रे जरिये कह्यो के हाल ताई 34 करोड़ ऊं बत्ता आयुष्मान कार्ड जारी कर दिया ज्या है।

000

प्रदेश मांय आज राष्ट्रीय लोक अदालतां लगायी ज्यी। लोक अदालतां सारू राज्य री अधीनस्थ अदालतां मांय 512 बैचां बणायी ज्यी। राजस्थान हाईकोर्ट री जोधपुर मुख्य पीठ मांय पांच अर जयपुर पीठ मांय 4 बैच बणायी ज्यी। प्रदेश मांय हाईकोर्ट समेत अधीनस्थ अदालतां मांय राजीनामा लायक सिविल, आपराधिक, सेवा, श्रम, मोटर दुर्घटना अर पारिवारिक अदालतां मांय चाल रह्या करीब 10 लाख मामलां माथे सुणवाई तय करी ज्यी ही। दौसा जिला मांय लगायी ज्यी 14 लोक अदालतां मांय 16 हजार ऊं बत्ता मामला सुणवाई सारू लायी ज्या। बूंदी मांय ई 13 बैच बणायी ज्यी।

0000

उच्चतम न्यायालय राजस्थान समेत न्यारा-न्यारा राज्यां मांय और ग्राम न्यायालय खोलण सारू कह्यो है। अदालत राज्यां रा मुख्य सचिवां ऊं संबंधित राज्यां मांय उच्च न्यायालय के रजिस्ट्रार जनरल के साथ अतिरिक्त ग्राम न्यायालय खोलने पर चर्चा करें। सुप्रीम कोर्ट ने अदालतों में बुनियादी ढांचा विकसित करने, लम्बित मामलों को कम करने, पक्षकारों को जल्द न्याय दिलाने और आमजन को सस्ता तथा सुलभ न्याय प्रदान करने के उद्देश्य से दायर जनहित याचिका पर सुनवाई करते हुए यह आदेश दिये।

000

प्रदेश रा घणखर हलकां मांय आज ई चौमासा री बिरखा व्ही। आज जयपुर, टोंक, झालावाड़ अर धौलपुर मांय कठे-कठे बायरो बाजण सागे तेज बारिश व्ही, जदके अजमेर, भीलवाड़ा, सीकर, नागौर, अलवर, भरतपुर, बूंदी, सवाईमाधोपुर, चूरू, बारां अर कोटा समेत केई जिलां मांय हल्की ऊं मझला दर्जा री बिरखा रा समाचार है। आं जिला मांय रात री बगत ई बिरखा व्हेवण रा आसार है। टोंक जिला रा देवली उपखण्ड मांय काल मोड़ी रात व्ही बिरखा ऊं केई गांवां रा गेला बंद व्हे ग्या। जिला रा सेदियावास री सरकारी स्कूल रा भवन मांय खूब पाणी भर ग्यो। बूंदी जिला रा बरधा बंधा मांय लगातार पाणी आ रह्यो है, जिण ऊं बंधा मांय पाणी रो लेवल बध र साढे 18 फीट व्हे ग्यो है। मौसम विभाग रे मुजब आवता तीन दिन जयपुर, कोटा, भरतपुर, अजमेर, उदयपुर, बीकानेर अर जोधपुर संभाग मांय चौमासा री चौखी बिरखा व्हेवण रा आसार है।

0000

बाड़मेर जिला रा धनाउ थाना हलका मांय एक सरकारी सीनियर सेकेंडरी स्कूल मांय चाल रह्या 10वीं अर 12वीं री स्टेट ओपन परीक्षा मांय दूजा उम्मीदवार री ठोड़ इम्तेहान देवण रा आरोप मांय पुलिस 17 जणां ने गिरफ्तार कीना है। आं मांय तीन नाबालिग ई शामिल है ज्यां ने निरुद्ध करी ज्या है। दसवीं री हिंदी री परीक्षा मांय 19 फर्जी उम्मीदवारां अर 12वीं री जीव विज्ञान री परीक्षा मांय एक फर्जी परीक्षार्थी ने पकडी ज्या। एस.पी. नरेंद्र सिंह मीना आ जाणकारी दीनी। परीक्षा केंद्र रा अधीक्षक जबर सिंह शंका व्हेवण परां पुलिस ने जाणकारी दीनी। पुलिस जांच रे दौरान परीक्षा दे रह्या 11 फर्जी छात्रां अर 9 छात्रावां ने पकड्या।

000

भारत अर जिम्बाब्वे बीचे चौथो टी-ट्वेंटी क्रिकेट मैच आज हरारे मांय खेल्यो जा रह्यो है। जिम्बाब्वे भारत ने जीतण सारू 153 रन बणावण री चुनौती दीनी है। भारत टॉस जीत र पैली गेंदबाजी रो फ़ैसलो कीनो। तय 20 ओवर रा खेल मांय जिम्बाब्वे री टीम 152 रन बणा र आउट व्हेगी। भारत री ओर ऊं खलील अहमद 2, तुषार देशपाण्डे, वाशिंगटन सुन्दर, अभिषेक शर्मा अर शिवम दुबे एक-एक विकेट लीना। जिम्बाब्वे री ओर ऊं कप्तान सिकन्दर रजा सर्वाधिक 46 रन बणाया। पांच मुकाबला री श्रृंखला मांय भारत दो-एक ऊं आगे है। श्रृंखला रो पांचवो अर अंतिम मैच काले हरारे मांय ही खेल्यो जावेला।

0000

डूंगरपुर मांय स्कूलां मांय विद्यार्थियां री तादाद बधावण अर टाबरियां री भणार्ई-लिखाई ने बधावो देवण सारू विद्यार्थी जागरूकता रैली निकाळी। डूंगरपुर मांय मेताली रा राजकीय उच्च माध्यमिक विद्यालय मांय प्रवेशोत्सव मनायी ज्यो। रैली पाछे स्कूल मांय बेहतरीन नतीजा देवण वाळा अध्यापकां रो विद्यार्थी अर गांव वाळा मान कीनो।

00000

केंद्रीय संस्कृति अर पर्यटन मंत्री गजेंद्र सिंह शेखावत कह्यो है के भारत मांय पहली दफा गैर सरकारी हलका मांय स्काईडाइविंग रो सुबीतो सरू व्हेवणो घणो खास है। वे वर्ल्ड स्काईडाइविंग डे रे मौके हरियाणा रा नारनौल मांय स्काईडाइविंग विमान ने हरी झंडी बता र रवाना कीनो। ई मौके वे कह्यो के पर्यटन मंत्री व्हेवण रे नाते सगळां सारू सुबीता मुहैया करावण अर बत्ता ऊं बत्ता लोगां ने हिफाजती मानकां सागे ऐ सुबीता मुहैया करावण री वां री जिम्मेदारी है। केन्द्रीय मंत्री खुद टैन्डम स्काईडाइविंग कीनी। वे जहाज ऊं कूदण रा अनुभव ने घणो रोमांचक बतायो।

00000

फौज री दक्षिणी कमान रा कमांडर लेफ्टिनेंट जनरल धीरज सेठ कोणार्क कोर रो दौरा कर र कोर री तैयारियां रो जायज़ो लीनो अर कोर रा अहलकारां अर फौजियां सागे बातचीत कीनी। कमांडर ने परिचालन, प्रशिक्षण अर प्रशासनिक हलचल रा बारा मांय जाणकारी दीरीजी। जनरल ऑफिसर कमान्डिंग इन चीफ ने परिचालन अर प्रशासनिक बूता बधावण सारू न्यारी-न्यारी इकाइयां कानी ऊं करी ज्या तकनीकी समावेशन सारू करी ज्या न्यारा-न्यारा जतन री जाणकारी दीरीजी। वे सगळी रैंक रा फौजियां ऊं उभरता खतरां रो सामो करण सारू तैयार रेहवण बाबत कह्यो।

00000